

編號 5 號

【特別个水煎包】曾俊鑾原作

水煎包這種傳統點心滿哪仔都看得著，臺灣个水煎包大體係包玻璃菜个，毋過當好運，佢在學校食過一種特別个水煎包。

下晝三點過後日頭轉影¹，天時較涼哩，下課同學會湊等去打籃球，成下仔會看著，一個背痾痾个外省老阿伯企在側角。佢扞等一隻藍仔，當像驚人知樣仔，把守一隻無法度講个秘密，佢出現个時節總係看東看西，等佢兜行前去，正細心細意掀開蒙在籃仔頂背个布仔，係一籃正起鑊無幾久還燒炮炮仔个水煎包。

佢兜當當在該轉骨²，做儘像飯豚仔³樣仔，到下晝早就枵到肚屎覓背囊哩，逐儕歡喜露天撈錢相爭愛買。該無帶錢又想愛食个人愛仰結煞正好呢？佢兜會講：「這擺你先請，下二擺換佢請你，好無？」兩下半，本成疊到錐錐个水煎包就分人拿貳兩三層。

水煎包下背墊張紙，佢兜連洗手都懶，五支手指頭托等，開

嘴就醒⁴落去，當像毋會燒人樣仔，緊呵緊講：「好食！好食！」水煎包有較赤⁵，老阿伯盡周到，既經薄薄仔先掌過辣油，佢个水煎包係正宗上海、蘇州个江南口味，豬肉做个料仔，摻等雞卵、蔥仔、香油、鹽這兜配料，係講若个嘴罈精，你還食得出有搗到綿綿个薑嫖，毋敢食辣个同學，乜試著好食。

佢兜緊食緊摻隔壁球場个人搽手，摻食到伸半隻个水煎包拿到高高，喊佢兜愛買就愛趕緊，機會難得，過貳這滿，下二滿毋知愛等到哪時。結果，佢兜做儘分好食个水煎包錫錫過來，連平常較有規矩个細妹仔乜湊陣走等過來，老阿伯个嘴角慢慢仔有一息仔笑。

毋過，一陣嘩嘩仔聲就像風馳雨⁶，摻這場正開始鬧熱个生理打到浪浪散，高中部个教官仔行過來哩，佢本成就面逼逼，這下還較像牛頭馬面，大自家走到尾瀉屎，外省老阿伯乜摻藍仔擰起來，恬恬行往出，對哪搭仔出現，就對哪搭仔毋見貳去。

單淨水煎包个味緒還留在佢兜个嘴角。

¹ 日頭轉影：音 ngidˋ teuˋ zonˋ iangˋ；日影偏斜。

² 轉骨：音 zonˋ gudˋ；指兒童體格發育為成人體格的過渡階段。

³ 飯豚仔：音 fan tunˋ eˋ；指將到青春年紀食量特別大的人。

⁴ 醒：音 sen；咬。

⁵ 赤：音 caŋˋ；黃褐色，喻煎得表皮焦黃。

⁶ 風馳雨：音 fungˋ ciŋˋ iˋ；西北雨。